

PERDANA LIBRARY
PERDANA LEADERSHIP FOUNDATION
NEWSPAPER CLIPPING

Newspaper	Utusan Malaysia
Date	24 October 2015

Mahkamah dengar permohonan PM 14 Mac 2016

Um - 24/10/2015

KUALA LUMPUR 23 Okt. - Permohonan Datuk Seri Najib Tun Razak supaya kes saman beliau dan isterinya, Datin Seri Rosmah Mansor terhadap Ahli Parlimen Taiping, Nga Kor Ming diputuskan melalui isu perundangan tanpa perbicaraan penuh akan didengar di Mahkamah Tinggi di sini pada 14 Mac tahun depan.

Saman itu berhubung dakwaan Kor Ming telah memuat naik status bergambar dalam laman sosial Facebook atas nama wakil rakyat DAP itu pada 29 Mac lalu yang didakwa berbau fitnah dengan menyentuh dan menyindir pasangan terbabit.

Peguam Choo Shi Jin yang mewakili pasangan tersebut memberitahu pemberita, permohonan itu difailkan pihaknya pada 10 September lalu.

Yang turut mewakili Najib dan Rosmah selaku pihak plaintif ialah peguam Nurshafiqah Balqish Jaffri.

Menurut Shi Jin, Pesuruhjaya Kehakiman, Siti Khadijah S. Hassan Badjenid pada tarikh tersebut juga akan mendengar permohonan Kor Ming untuk membatalkan saman Najib dan Rosmah.

Perkembangan kes itu disahkan oleh peguam Dennis Goh mewakili Kor Ming yang dinamakan sebagai pihak defendan sejurus selepas pengurusan kes di kamar hakim petang ini.

Mahkamah sebelum ini menetapkan selama empat hari perbicaraan kes itu yang akan bermula pada 16 Mei tahun depan dan disambung empat hari lagi pada 23 Mei tahun sama jika permohonan pihak plaintif ditolak.

Dalam pernyataan tuntutan bertarikh 11 Jun lalu, pihak plaintif menyatakan, Kor Ming telah menerbitkan perkataan, *Meeting Kerajaan...Siapa PM Malaysia yang sebenarnya.*

Pasangan itu mendakwa dalam status bergambar itu terpampang gambar mereka bersama dengan beberapa orang menteri Kabinet Malaysia dan pegawai tertinggi Wisma Putra di dalam sebuah bilik hotel di China.

Perkataan tersebut menurut pihak plaintif telah merosakkan reputasi mereka berdua sehingga menyebabkan ketegangan hubungan rakyat dan pihak-pihak antarabangsa.